

02 OCT 2002

PM-SIDANG KEMUNCAK/I

PM SAMPAI UCAPTAMA PADA SIDANG KEMUNCAK EAES

KUALA LUMPUR, 2 Okt (Bernama) -- Perdana Menteri Datuk Seri Dr Mahathir Mohamad akan menyampai ucaptama pada majlis pembukaan makan malam Sidang Kemuncak Ekonomi Asia Timur Tahunan pada 6 Okt, 2002, demikian menurut Institut Kepimpinan dan Strategik Asia (ASLI) dalam satu kenyataan akhbar di sini hari ini.

Sidang Kemuncak Ekonomi Asia Timur bagi Forum Ekonomi Dunia berpangkalan di Davos itu yang akan dihadiri oleh pemimpin-pemimpin dunia akan diadakan di Kuala Lumpur buat julung-julung kalinya, bermula 6 hingga 8 Okt ini.

Antara pemimpin-pemimpin yang akan menghadiri sidang kemuncak itu termasuklah Perdana Menteri Singapura Goh Chok Tong, Perdana Menteri Thailand Thaksin Shinawatra dan Sri Lanka Chandrika Bandaranaike Kumaratunga.

ASLI berkata sidang kemuncak itu juga menyediakan peluang kepada pemimpin perniagaan Malaysia mendapatkan maklumat terkini mengenai cabaran global, trend utama dan isu-isu strategik.

Antara isu-isu yang akan dibincangkan pada Sidang Kemuncak itu termasuklah Membina Semula Daya Saing Asia, Integrasi Asia, Firma Asia Global dan Pemimpin-pemimpin Wanita di Asia.

Antara penceramah pada Sidang Kemuncak itu ialah presiden Petronas, Tan Sri Hassan Merican, Menteri Pertahanan Datuk Sri Najib Tun Razak dan presiden ASLI Mirzan Mahathir.

Petronas dan ASLI merupakan rakan kerjasama Forum Ekonomi Dunia dalam melaksanakan Sidang Kemuncak Asia Timur. -- BERNAMA

MFZ KTC AA